



**Consorzi da scoula
Ramosch-Tschlin**

UORDEN DA SCOULA

5 OCTOBER 2006

Relaschè da la radunanza dal consorzi dals 5 october 2006 in basa a l'art. 50 da la ledscha chantunala da scoula dals 26 november 2000 e'ls statuts dal consorzi dals 22 settember 2003.

I. Disposiziuns generalas

Tips e lös da scoula	<p><u>Art. 1</u> ¹Il consorzi da scoula maina ils seguaints tips da scoula:</p> <ol style="list-style-type: none"> 1. scoula primara; 2. classas pitschnas; 3. scoula reala; 4. scoula secundara; <p>²Il consorzi da scoula maina implü üna scoulina.</p> <p>³Ils lös da scoula e da scoulina as drizzan tenor art. 3 dals statuts.</p>
Oblig d'ir a scoula	<p><u>Art. 2</u> L'oblig d'ir a scoula illa scoula populara as drizza tenor las disposiziuns da la legislaziun chantunala da scoula.</p>
Temp da scoula	<p><u>Art. 3</u> ¹L'on da scoula cumainza davo las vacanzas da stà, tanter la mittà d'avuost e da settember e düra 38 eivnas effectivas da scoula.</p> <p>²Tenor cunvegna ed in coordinaziun culs cussagls da scoula da la regiun fixa il cussagl da scoula ils termins per l'on da scoula e las vacanzas. Sur Nadal e da prümavaira esa da fixar almain ün'eivna vacanzas. Vacanzas nu das-chan dürar daplü co 10 eivnas la jada.</p> <p>³Il temp da scoula per eivna illa scoula populara s'extenda d'ürant tschinch dis da lündeschdi fin venderdi.</p>
Temp d'instrucziun	<p><u>Art. 4</u> ¹Il cussagl da scoula fixa il temp d'instrucziun per di tenor las disposziuns da la legislaziun chantunala da scoula.</p> <p>²Il temp d'instrucziun per eivna inclus ils roms d'elecziun as drizza tenor las prescripziuns da la legislaziun chantunala da scoula.</p>
Absenzas a) motivs da s-chüsa	<p><u>Art. 5</u> ¹Sco motivs da s-chüsa per absenzas vaglian specialmaing:</p> <ol style="list-style-type: none"> 1. malatia o accidaint dal scolar, da confamigliars o d'otras persunas da referenza; 2. privel da lavinas o vias intransiblas; 3. mort d'ün confamigliar o d'ün'otra persuna da referenza e funeral da struschs paraints o da persunas da referenza; <p>²Absenzas sun d'annunzchar subit a la persuna d'instrucziun competenta.</p> <p>³In cas d'absenza pervi da malatia o accidaint dal scolar chi surpassan tschinch dis, po la persuna d'instrucziun pretender dal rapreschantant legal ün attestat dal meidi a man dal cussagl da scoula.</p> <p>⁴Schi vain dubitada l'existenza d'ün motiv da s-chüsa, decida il cussagl da scoula definitivmaing.</p>

b) congedi	<p><u>Art. 6</u></p> <p>¹ Congedi po gnir concess fin totalmaing 15 dis da scoula l'on. Pel permiss da congedi per daplü co 15 dis da scoula es cumpetent l'uffizi per las scoulas popularas e las scoulinas.</p> <p>² Dumondas da congedi motivadas e previsiblas sun d'inoltrar in scrit almain trais dis avant il congedi. Ellas pon gnir concessas fin ün di da la persuna d'instrucziun, fin trais dis dal president dal cussagl da scoula e per daplü co trais dis dal cussagl da scoula.</p> <p>³ Decisiuns davart dumondas da congedi sun definitivas.</p>
Dis da congedi	<p><u>Art. 7</u></p> <p>... ¹⁾</p> <p>1) aboli tenor decisiun da la radunanza da consorzi dals 5 october 2006.</p>
Attestat, promoziun	<p><u>Art. 8</u></p> <p>L'emissiun dals attestats e la promoziun as drizzan tenor las disposiziuns da la legislaziun chantunala da scoula.</p>

II. Las personas d'instrucziun

Relaziun d'ingaschamaint	<p><u>Art. 9</u></p> <p>¹ Las personas d'instrucziun sun impiegadas dal consorzi da scoula.</p> <p>² La relaziun d'ingaschamaint da las personas d'instrucziun vain fundada, observand la legislaziun chantunala respectiva, tras ün contrat da dret public.</p>
Occupaziun dubla da piazzas	<p><u>Art. 10</u></p> <p>Occupaziuns dublas d'üna piazza da persuna d'instrucziun pon gnir permissas dal cussagl da scoula.</p>
Incumbenzas	<p><u>Art. 11</u></p> <p>¹ La persuna d'instrucziun ha d'accurrir conscienziusamaing ils obligs da sia piazza, dad instruir tenor il plan d'instrucziun, da seguir las directivas dal cussagl da scoula e da promover la prosperità da la scoula.</p> <p>² A la persuna d'instrucziun suprastà impustüt:</p> <ol style="list-style-type: none"> 1. da dar ils attestats; 2. d'infuormar al rapreschantant legal davart üna promoziun periclitada cun rapport in scrit fin il plü tard duos mais avant la finischun da l'on da scoula; 3. d'annunzchar al cussagl da scoula las promoziuns e na-promoziuns dals scolars fin la finischun da l'on da scoula; 4. da mantgnair in concordanza cul cussagl da scoula il contact culs rapreschantants legals dals scolars, saja quai cun sairadas da genituors, uras d'audienza o in oters möds; 5. da survegliar ils scolars d'ürant las posas da scoula; 6. d'evader cas disciplinaris da paca portata tenor las disposiziuns dal uorden da disciplina; 7. da conceder als scolars congedis i'l rom da las cumpetenzas tenor art. 6; 8. da frequentar ils cuors da perfecziunamaint tenor las directivas chantunalas e las disposiziuns dal cussagl da scoula.

III. Il cussagl da scoula

Organisaziun	<p><u>Art. 12</u> L'organisaziun dal cussagl da scoula as drizza tenor art. 12 e seguaints dals statuts dal consorzi.</p>
Dovairs e cumpetenzas	<p><u>Art. 13</u> ¹Il cussagl da scoula maina e survaglia la scoula e la scoulina. El exeguischa la legislaziun chantunala e consorziala. El accumulaischa las lezchas chi nu sun surdattas tras ledschas chantunalas o consorzialas ad ün'otra autorità o istanza.</p> <p>²Il cussagl da scoula ha sper las lezchas circumscriittas i'ls statuts dal consorzi seguaints dovairs e seguaintas cumpetenzas:</p> <ol style="list-style-type: none"> 1. partir aint ils scolars in classas ed attribuir las classas a personas d'instrucziun; 2. decider davart l'attribuziun d'uffants cun impedimaints d'imprender in üna classa pitschna e davart la dimensiun da l'instrucziun; 3. far proposta a l'uffizi per secturs specials da scoula d'attribuir uffants cun talents specials o fich talentats ad üna classa pitschna resp. tour masüras da promoziun specialas per els; 4. organisar la promoziun linguistica illa lingua d'instrucziun per uffants da lingua estra; 5. organisar in cas d'üna integraziun d'uffants cun impedimaints i'l sistem grischun da scoula e da scoulina; 6. organisar las masüras pedagogic-terapeuticas disponidas da l'uffizi per secturs specials da scoula; 7. decider davart l'admissiun d'ün scolar i'l deschavel on da scoula; 8. eleger il meidi e'l daintist da scoula sco eir d'organisar il servezzan da meidi e la chüra da daints pels scolars; 9. approvar occurenzas da scoula e da sport sco eir eivnas da proget; 10. organisar il transport da scolars; 11. congediar personas d'instrucziun per conferenzas, cuors, collavuraziuns in cumischiuns da scoula e gruppas da lavur sco eir per otras activitats dadour la lavur. Permiss da congedi fin trais dis dà il president dal cussagl da scoula, per congedis plü lungs es cumpetent il cussagl da scoula; 12. reglar ils cas penals tenor la procedura penala d'uffants sco eir chastiar absenzas da scoula.
President	<p><u>Art. 14</u> ¹Il president dal cussagl da scoula ha specialmaing ils seguaints dovairs e las seguaintas cumpetenzas:</p> <ol style="list-style-type: none"> 1. rapreschainta il cussagl da scoula vers l'extern; 2. survaglia <ol style="list-style-type: none"> a) la repartiziun da las classas al cumanzamaint da l'on da scoula tenor las decisiuns dal cussagl da scoula; b) l'intera gestiun da scoula, specialmaing l'observaziun da l'urari e dals temps d'instrucziun; 3. fa l'inquisiziun in cas disciplinars; 4. prepara las fatschendas dal cussagl da scoula ed effetuescha las decisiuns trattas. <p>²In cas urgients piglia il president dal cussagl da scoula las masüras necessarias chi pertoccan il champ da cumpetenza dal cussagl da scoula. Tenor pussibilità decida il cussagl da scoula definitivmaing illa prossma sezzüda.</p>

IV. Dret da recuors

Reclamaziuns cunter persunas d'instrucziun	<u>Art. 15</u> Reclamaziuns cunter persunas d'instrucziun sun d'inoltrar in scrit al cussagl da scoula.
Decisiuns da promoziun o na-promoziun	<u>Art. 16</u> Recuors cunter disposiziuns davart la promoziun o la na-promoziun sto la persuna directamaing pertocca inoltrar infra 14 dis a l'inspectorat da scoula cumpetent. Quel sto güdichar il recuors davo avair consultà il cussagl da scoula. Cunter la decisiun da l'inspectorat da scoula as po recuorrer infra 14 dis pro'l departamaint d'educaziun, cultura e protecziun da l'ambient dal Grischun.
Decisiuns dal president dal cussagl da scoula	<u>Art. 17</u> Cunter disposiziuns dal president dal cussagl da scoula pon las persunas directamaing pertoccas recuorrer infra 14 dis daspö la comunicaziun, in scrit al cussagl da scoula.
Decisiuns dal cussagl da scoula	<u>Art. 18</u> Cunter decisiuns e disposiziuns dal cussagl da scoula in fatschendas da scoula po la persuna directamaing pertocca recuorrer infra 14 dis daspö la comunicaziun, in scrit al departamaint d'educaziun, cultura e protecziun da l'ambient dal Grischun, premiss cha la ledscha chantunala da scoula nu dispuona otramain.
Decisiuns illa procedura penala d'uffants	<u>Art. 19</u> Cunter decisiuns dal cussagl da scoula illa procedura penala d'uffants po il rapreschantant legal e/o il procuratur per juvenils recuorrer infra 20 dis daspö la comunicaziun in scrit, a la giunta dal güdisch districtual cumpetent sco güdisch da juvenils.
Entrada in vigur	<u>Art. 20</u> Quist uorden da scoula aintra in vigur cull'approvaziun dal departamaint d'educaziun, cultura e protecziun da l'ambient dal Grischun. El rimplazza il uorden da scoula dals 30 settember 2002.

Consozri da scoula Ramosch-Tschlin

il president:

l'actuara:

Mario Molinaro

Anita Bischoff

Approvà dal departamaint d'educaziun, cultura e protecziun da l'ambient tenor disposiziun dal departemaint no. 431 dals 16 october 2006.